

Plasa Condor lo wordo embeyece

ORANJESTAD – Dilanti di Pricesmart, Asocion Amigos de Colombia (Asocol) a construi un plasa riba un pida tereno cu gobierno a otorga nan. Riba e tereno aki un escultura monumental di un aguila traha di brons a wordo instala pa simbolisa di un forma tangibel e proceso di integracion di e comunidad Colombiano na Aruba y como un simbolo di fraternidad entre ambos pueblo.

Considerando cu e plasa aki ta situa den un sitio masha central pa bista di tur hende y cerca di nos aeropuerto, Asocol conhuntamente cu Consulado di Colombia na Aruba y cu e colaboracion di e comunidad Colombiano lo embeyece e plasa aki.

Limpiesa

Presidente di Asocol, sr. Nicolais Ponson a declara na Bon Dia Aruba cu nan kier bin cla lihe cu e proyecto aki. El a bisa cu nan kier caba cu e acusacion cu e plasa aki semper ta sushi. E ta reconoce cu no ta facil pa mantene e plasa constantemente limpi, ya cu e tin un area amplio di santo rond di e plasa mes y yerba ta crece lihe. “Nos por



haci limpi awe pero un siman despues e ta yen di yerba atrobe”, el a bisa. Igualmente e ta lamenta cu falta mas conscientisacion y sentido di pertenencia di nos hendenan, ya cu si bo ta wak cu e ta sushi ban colabora pa mantene limpi e luga y no bin critica di biaha.

Solucion duradero

Pa busca un solucion duradero na e problema aki, Asocol y Consulado di Colombia na Aruba lo haci un yamada na e comunidad Colombiano,

entre nan e sector comercial y no comercial pa sinta hunto pa recauda fondo y basha e area aki cu concret di Bomanite. Ya caba nan a papia cu e doño di Bomanite, sr. Andrei Giraldo kende a demostra su generosidad dunando un prijs special pa contribui cu e bunita obra aki pa embeyece e Plasa Condor. Esunnan interesa pa duna su donacion lo por duna su aportacion directamente cu Bomanite y despues entrega e recibo na e Consulado di Colombia of na Asocol. □